

續資治通鑑

冊
吳

圖書集成

續資治通鑑卷第一百五十六

賜進士及第兵部尚書兼都察院右都御史總督湖北湖南等處地方軍務兼理糧餉世襲二等輕車都尉畢沅編集

宋紀一百五十六

起重光作噩正月盡闕逢困敦三月凡三年有奇

寧宗法天備道純德茂功仁文哲武聖睿恭孝

皇帝

嘉泰元年

金泰和元年

春正月戊午申嚴福建科鹽之禁

壬戌謝深甫等薦士二十有五人詔籍名中書以

待選擢

丁卯命路鈐按閱都州兵士毋受餽遺及

擅招軍違者寘諸法

己巳金太府監孫復言方今

在仕者三萬七千餘人而門廕補敘居三之二諸司

待闕動至累年蓋由補廕猥多流品混淆本末相舛

至於進納之人既無勞績又非科第而亦廕子孫無

所分別欲流之清必澄其源金主然之詔更定廢敘
法 金尙書省奏杖式輕細民不知畏請用大杖詔
不許過五分 庚午以葛邲配享光宗廟庭 金主
如長春宮春水辛未金主以方春禁殺食胎兔犯者
罪之告者賞之 甲戌金初命文武官職至三品者
許贈其祖 二月戊子詔諸州訪求明歷之士 壬
辰開資善堂以祕書郎婁機兼小學教授機以累朝
事親修身治國愛民四事手書以獻 癸巳修光宗
實錄 言者稱四川制置司遇類省試年分做禮部
附試學官許有出身人具所業赴制置司陳乞委有
出身通判或教授看詳蜀人試教官自此始 丁未
金主還都金主嘗與司空襄言秋山之樂意將有事
於春蒐也顧視平章政事張萬公萬公曰動何如靜

金主改容而止。三月丙寅雨雪兩雹。戊辰頒慶元寬恤詔令役法撮要。丁丑金更定鎮防千戶。穆昆放老入除格。戊寅行都大火四日乃滅。焚居民五萬三千餘家。帝下詔罪己避殿減膳。命臨安府察姦民縱火者罪以軍法。出內府錢十六萬米六萬餘斛賜被火之家。金內侍李新喜有寵用事借大興府妓樂知大興府事完顏承暉拒不與新喜慙。金主聞而嘉之。豪民與人爭種稻水利不直厚賂左宣徽使李仁惠使人屬承暉承暉杖豪民而遣之。謂其人曰此可以報宣徽也。承暉先爲提刑豪猾屏迹。及尹京尤以剛正稱而權貴多不悅。尋罷以赫舍哩執中代之。是春以和州防禦使姜特立爲寧遠軍節度使。夏四月辛卯詔曰風俗侈靡日甚一日服食器

用無復差等今被焚之餘其令官民營造室屋一遵
制度務從簡朴銷金鋪翠毋得服用今以宮中所有
焚之通衢中外士庶令有司嚴立禁防貴近之家尤
當遵奉苟違斯令必罰無赦 龍州蕃部寇邊先是
龍州蕃人常至濁水寨互市寨有豪民受而儲之及
蘇肅之知龍州以豪民擅利乃罪而移之自是蕃人
鹽糧米茶之屬皆不可得茲民李蒙大以作過竄入
龍州蕃部誘之入寇四川制置司以聞詔遣官軍討
之 戊戌以潛邸爲開元宮 甲辰金諭契丹人戶
累經簽軍立功者官賞恩例與女直人同仍許養馬
爲吏知大興府事赫舍哩執中格詔不下金主責之
曰汝雖意在防閑而不知朝廷自有定格自今勿復
如此煩碎生事也乃下詔行之 五月甲寅金主擊

毬於臨武殿令都民縱觀 丙辰金樞密使崇浩罷

戊午以旱禱於天地宗廟社稷詔大理三衙臨安

府兩浙州縣決繫囚一攷異宋史全文兩朝綱目備要俱作戊辰今從宋史本紀癸亥釋

諸路杖以下囚除茶鹽賞錢丁卯命有司舉行寬恤

之政十有六條 乙亥監太平惠民局夏允中請用

文彥博故事以韓侂胄平章軍國重事一攷異九中上書宋史韓侂胄

傳作三年本紀作元年兩朝綱目備要與本紀同今從之侂胄上疏歷敘家世榮寵言

臣不能自奮濫叨世賞陛下龍飛之日面奉憲聖皇

后旨俾臣朝夕仰裨初政臣深惟綿薄不足以副使

令忽聞局務官有劄子引文彥博故事肆為狂妄之

言臣駭汗如雨斯人固不足責而臣之出處豈容不

明乞許臣守本官致仕以全愚分帝手批慰留允中

坐免仍令臨安府押出國門 丙子雨 六月辛卯

金祈雨於北郊 己亥金敕尚書省舉行奢僭之禁

金用尚書省言申明舊制明安穆昆戶每田四十

畝樹桑一畝毀樹木者有禁鬻地土者有刑其田多

汙萊人戶闕乏竝坐所臨長吏按察使以時勸督有

故慢者量決罰之仍減牛頭稅三之一 乙巳金初

許諸科鋪馬黃河夫軍須等錢折納銀一半願納錢

鈔者聽 丙午太白經天 秋七月乙卯知樞密院

事何澹罷時吳曦自以祖父世守西蜀為國藩屏而

身留行都不得如志乃厚賂宰輔規圖帥蜀未及賂

澹韓侂胄已許之澹持不可侂胄怒曰始以君冑相

就黜偽學汲引至此今顧立異耶遂罷為資政殿學

士知太平州翼日改大學士

一攷異二兩朝綱目會要謂澹以第滌之累亦乞罷今從宋史本

傳薛氏通鑑作與祠誤也今從備要

丁巳復以旱祈禱壬戌恤囚

甲子

以陳自強參知政事張釜簽書樞密院事 金主諭

刑部官凡上書言及宰相者不得申省 己巳以吳

曦爲興州都統制兼知興州先是郭杲在武興多刻

剝軍士黑谷逃卒爲盜經時未平杲卒副都統制王

大節攝帥事語諸將曰是迫於饑寒非有它揭榜招

還之斬爲首者以徇流配其餘吳氏世守西蜀蜀人

習而安之承郭杲之後聞曦除帥延頸望其來曦盡

載輜重大艦連屬溯嘉陵而上及至首爲璘建廟大

殿費十萬緡又命士卒負土築江濱地際山爲園廣

袤數里日役數千人士始失望旣而曦譖大節罷其

副都統制於是蜀之兵權悉歸於曦 金禁廟諱同

音字金主嘗問孫卽康曰太宗廟諱同音字有讀作

成字者旣非同音便不當闕點畫睿宗廟諱改作崇

字其下卻有本字全體若將示字依蘭亭帖寫作未
字允字合闕點畫如統傍之允似不合缺卽康對曰
唐太宗諱世民偏傍犯如葉字作葉字泯字作泯字
乃擬熙宗廟諱從面從且睿宗廟諱上字從未下字
從卉世宗廟諱從系顯宗廟諱如正犯字形止書斜
畫流字銳字各從口兌悅之類各從本體從之自此
不勝曲避矣 八月己卯減奏薦恩以言者論官冗
恩濫故也 庚辰金命絕戶之田宅以二分之一付
其女及女孫 甲申張釜罷以陳自強兼知樞密院
事給事中張巖參知政事右諫議大夫程松同知樞
密院事巖松竝附韓侂胄松諂之尤甚侂胄憐之遂
得佐樞 壬寅金制明安穆昆竝隸按察司監察御
史止按部糾舉有罪併坐監臨之官 直龍圖閣致

仕李詳卒詳直諒老成以植公論因罹黨禍後謚肅

簡 西遼主珠勒呼舊作直魯出獵柰曼舊作乃庫楚蠻今改

類舊作屈出律今改伏兵擒之而據其位襲遼衣冠尊珠勒呼

為太上皇皇后為皇太后朝夕問起居珠勒呼在位

三十四年尋死遼祀遂絕一攷異庫楚類襲遼衣冠而遼祀絕此據遼史書之據元史則庫楚

類即油延汗之子元太祖本紀三年戊辰征庫楚類汗庫楚類奔契

丹考珠勒呼之被擒在癸酉年去戊辰僅八年既云庫楚類據其位

矣而戊辰年所奔之契丹又係何國耶元聖武親征錄云庫楚類以

數人奔契丹王菊爾可汗豈襲衣冠而據位為菊爾可汗而非庫楚

類耶元遺山文集云車駕征契丹餘族是為西遼殆柰曼別部之

襲遼衣冠者即稱西遼耶抑別有餘族耶史文脫落錄以識疑

九月戊申朔金更定贍學養士法生員給民佃官田

人六十畝歲支粟三十石國子生人百八畝歲給以

所入官為掌其數 先是戶部尚書袁說友等言浙

西圍田相望皆千百畝陂塘瀟瀟悉為田濤潦則無

地可瀦旱則無水可辱不嚴禁之後將益甚辛亥遣

大理司直留佑賢宗正寺主簿李澄往浙西行視自
淳熙十一年立石之後凡官民田園裹者悉開之

甲寅金主如秋山 甲戌令禮部集孝宗朝典禮

丙子金主還都 冬十月乙酉金裕享於太廟 丙

戌起居郎王容請以韓侂胄定策事迹付史館從之

壬辰金御史臺言在制按察使官比任終遣官考

覈然後尚書省遣官覆察之今監察御史添設員多

宜分路巡行每路女直漢人各一人同往從之仍敕

分四路 壬寅金敕有司購遺書宜高其價以廣搜

訪其藏書之家有珍襲不願送官者官爲謄寫畢復

還之仍量給其值之半 甲申編光宗御集 十一

月辛亥金敕尚書省凡役衆勞民之事勿輕行之

丁巳金主諭工部曰比聞懷州有橙結實官吏檢視

已嘗擾民今復進柑得無重擾乎其誠所司遇有則
進無則已 庚申蠲潭州民舊輸黃河鐵纜錢 金
陝西路轉運使高汝礪言舊制捕告私鹽酒麴者計
斤給賞錢皆徵於犯人然監官獲之則充正課巡捕
官則不賞巡捕軍則減常人之半免役弓手又半之
是罪同而賞異也請以司縣巡捕官不賞之數及巡
捕弓手所減者皆徵以入官則罪賞均矣金主從其
言 十二月己卯太白經天 辛巳金敕原廟春秋
祭祀改稱朝獻 金新修律成凡十有二篇一曰名
例二曰衛禁三曰職制四曰戶婚五曰廢庫六曰擅
興七曰賊盜八曰鬪訟九曰詐僞十曰雜律十一曰
捕亡十二曰斷獄實唐律也但加贖銅皆倍之增徒
至四年五年爲七削不合於時者四十七條增時用

之制百四十九條因而畧有所增益者二百八十有二條餘百二十六條皆從其舊又加分其一爲二分其一爲四者六條凡五百六十三條爲三十卷附注以明其義疏義以釋其疑名曰泰和律義自官品令職員令之下曰祠令戶令學令選舉令封爵令封贈令官衛令軍防令儀制令衣服令公式令祿令倉庫令廢牧令田令賦役令關市令捕亡令賞令醫疾令假寧令獄官令雜令僧道令營繕令河防令服制令附以年月之制曰律令二十卷又新定敕條三卷六部格式三卷丁酉司空襄具以進詔以明年五月頒行之 乙巳金初定廉能官升注法 是歲浙西江東兩淮利州路旱賑之仍蠲其賦

嘉泰二年

金泰和二年

春正月乙卯金始朝獻於衍慶宮

癸亥以蘇師旦兼樞密院都承旨初韓侂胄爲平江兵馬鈐轄時師旦以刀筆吏事之侂胄愛其辨慧帝登極竄姓名於藩邸吏士內遂以隨龍恩得官至是權勢日甚 丁卯陳自强等上高宗實錄 侍御史林采右正言施康年上疏曰臣聞習僞者名教之僂人欺君者臣子之大罪欺與僞實人材風俗之所深患不可不察也苟有人焉方僞習之熾則從之及僞習之衰則攻之彼自以爲媒身干進之計而不知墮于欺君之罪臣嘗謂由慶元初迄今人之趨向一歸於正謹守而隄防之權在二三執政大臣其次在給舍又其次在臺諫設使朝廷未知其人有所除授給舍不繳駁臺諫不論列百執事從而指其人聲其罪可也今乃不然徒肆諸空言遂使當世譁然指攻

僞爲釣取爵祿之資凡投匭而上書陞辭而進說召見而賜對其論一本於此望下臣此章播告中外繼自今專事忠恪毋肆欺謾不惟可以昭聖朝公正之心抑亦可以杜僞習淆亂之患時禁學之禍雖本韓侂胄欲去異己以快所私然實京鏜創謀及鏜死侂胄亦厭前事之紛紜欲稍更張以消中外之議且欲開邊而往時廢退之人又有以復讐之說進者故言官遂有此疏 癸酉金歸德軍節度副使韓琛以強市民布帛削一官罷之 甲戌金主如建春宮時金主將幸長樂川刑部尙書李愈諫曰方今戍卒貧弱百姓騷然三义尤近北陲恒防外患兼聞泰和宮在兩山間地勢狹隘雨潦湍集固不若北宮池臺之勝優游閑暇也金主不從 二月甲申弛僞學僞黨禁

張孝伯知韓侂胄已厭前事因謂之曰不弛黨禁恐後不免報復之禍籍田令陳景思韓侂胄之姻也亦謂侂胄當勿爲己甚侂胄從之于是趙汝愚追復資政殿學士黨人見在者徐誼劉光祖陳傅良章穎薛叔似葉適曾三聘項安世范仲黼黃顥詹體仁游仲鴻等諸人皆先後復官自便又削薦牘中不係僞學一節俾勿復有言 丁亥修高宗正史寶訓 戊子

頒治縣十二事以風厲縣令 癸巳禁私史有商人私持起居郎熊克中興小紀及九朝通畧等書欲渡淮盱貽軍以聞遂命諸道郡邑書坊所鬻書凡事干國體者悉令毀棄言者因請取禮部員外郎李燾續通鑑長編知龍州王偁東都事畧監都鹽倉李丙丁未錄及通家語錄家傳等書下史房考訂或有裨於